

Segun Tico Croes

Coastal ta hinca Aruba den riesgonan grandi

ORANJESTAD(AAN) -- Durante un conferencia di prensa, Tico Croes a duna di conoce cu a haci un profile encuanto Coastal. El a enfatisa cu AVP no ta contra di Oscar White manera coalicion di pretende sino AVP ta contra e maneho di Coastal cu por trece riesgonan grandi pa Aruba.

El a duna di conoce cu aña pasa e cu Mito Croes a bay New York pa haci un investigacion encuanto estructura estatal di Aruba. Nan a bin tende cu mester tene hopi cuidao cu Coastal.

A bisa Gobierno pa solicita informacion for departamentonan di Nacionnan Uni. Segun Tico Croes, Gobierno a laga sa cu no

ta interesa den esaki. AVP e ora ey a dicidi di haci un investigacion.

Tico Croes a señala cu na 1972 Coastal a cera full e suministro di gas na San Antonio pa asina pone presion pa aumenta e prijs di gas. Tabata tin hopi caso den Corte relaciona cu esaki. Esaki segun Croes ya ta duna e promer bista cu Coastal ta cera un contract pero na momento cu no ta combinie, no ta cumpli mas. Door di esaki tambe por cuestiona si Coastal ta di bon fe of no.

Tambe Croes a señala cu Coastal a cumpra un refineria na Hamburg, Alemania y despues di 5 aña el a cera esun na Antwerpen. Tur dos refineria a worde cumpra for di Coastal.

Segun Croes, Coastal ta busca su petroleo for Libia. Esaki a causa problema cu e Gobierno Americano ya cu na 1987 ex presidente Reagan a sanciona e maneho terrorista di Libia.

Croes a señala cu den Reuter dia 4 Januari 1990, representante di Coastal durante un entrevista a duna di conoce cu actualmente ta studiando ken lo bay suply petroleo pa e refineria na Aruba.

Segun Croes, e representante di Coastal a enfatisa cu Venezuela ta exclui for di esnan cu lo suply petroleo.

AVP ta teme cu despues di 5 aña, Coastal ta bay su portanan manera tabata e caso na Antwerpen.